





# Акафист

## святому преподобному

### Кукше Одесскому

---

#### **КОНДАК 1**

Избранный чудотворче и предивный угодниче Христа Бога нашего, в скорбех утешитель и в бедах скорый помощниче и молитвенниче, преподобный Отче Кукша, прославляем Господа Иисуса Христа и Пречистую Его Матерь, даровавших тя миру, пречудный Отче, на спасение душ и врачевание телес наших. Ты же, имеяй дерзновение ко Господу и Пренепорочней Деве Марии, от всяких нас бед и печалей избави, зовущих:  
**РАДУЙСЯ, ПРЕПОДОБНЫЙ ОТЧЕ НАШ КУКШЕ, ВЕЛИКИЙ ИСПОВЕДНИЧЕ ХРИСТОВ.**

#### **ИКОС 1**

Ангел во плоти воистину явился еси на земли, Отче Кукша, со младенческих лет желая узрети Царя Небеси и земли, и вся дни живота своего Тому с любовью верно послуживый. Сего ради и по кончине твоей сподобился видети Бога Славы и возносить хвалу Ему со Ангелы и со всеми

святыми. Мы же в радостном умилении глаголем  
ти таковая:

Радуйся, солнце, воссиявшее в смутное время  
гонения на православную церковь и служителей  
Ея;

Радуйся, луче светлый, благодатию Божией  
осиявший множество душ, тмою греховную  
объятый;

Радуйся, свеще, возжигающая пламень  
покаяния и умиления в сердцах окамененных;

Радуйся, огнем молитвы твоей грехи  
исповедающихся пожигающий;

Радуйся, любящий искренне кающихся Богу;

Радуйся, правило монашеского жития нам  
преподавай;

Радуйся, смиренномудрию, терпению и любви  
нас научаяй;

Радуйся, пример кротости, послушания и  
нищеты духовный показавши;

**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

## **КОНДАК 2**

Видя пламенную юношескую любовь твою к  
иноческому житию, Отче Кукша, матери твоя —  
благочестивая Харитина, умоли Царицу  
Небесную, да смягчит сердце родителя твоего,  
не хотевшего отпустить тебя на Святую Гору

Афон. Но волею Владычицы Богородицы благослови отец на радость всем сродникам путь твой новый и спасительный; мать же благослови ты образом древним Казанския Божия Матери, его же ты до конца дней своих сохранил еси и полгода на гробе Господнем возложена ему быти потщился еси, егда послан бысть на послушание во святой Храм Иерусалимский игуменом с горы Афона послужити на месте, идеже некогда лежаше пречистое тело Господа нашего Иисуса Христа, Ему же мы со благоговением поем:  
**АЛЛИЛУИА.**

## **ИКОС 2**

Разум свыше тебе даровася, Отче Святой, с отроческих лет помышляли, яко пресельники мы есть на земли и пришельцы, красоту временную мира сего возненавидел еси и иноческое житие возлюбил еси, боготечней звезде уподобился еси, Отче, Царствия ради Божия дом отеческий оставивый, во святую обитель с радостию востекши, сего ради поем ти:

Радуйся, лозо, Богом благословенная;

Радуйся, чадо, Божией Материю избранное;

Радуйся, благочестивой матерью земной

Небесней Матери врученный;

Радуйся, яко от юности до самыя кончины твоея под Святым покровом Ея хранимый;

Радуйся, чудотворным образом Божией Матери  
родительницей благословенный;

Радуйся, яко сей святой образ тобою до гроба  
сохраненный;

Радуйся, Царствия ради Божия дом родителей  
оставивый;

Радуйся, все блага земные ни во что же  
вменивый;

**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

### **КОНДАК 3**

Сила Вышняго на тебе показася, Отче  
преподобне, егда с благочестивою матерью своею  
сподобился еси посетити вся святыя места  
Палестинская, идеже в купель Силоамскую  
чудесне первый погрузися в пещере же  
Вифлеемстей, поганым турком охраняемой и не  
хотевше ему дати православным паломником  
елеа от святых лампады, на месте том  
возжигаемой, странно та лампада невидимо  
Ангелом опрокинута бысть на тя, избранный  
угодниче Христов. Люди же Божий, припадаху к  
тебе, Блаже, собирая той святой елей с риз  
твоих, умащающесе им и славяще рожденного  
Христа, в радости воспевающе Ему: АЛЛИЛУИА.

## ИКОС 3

Имеяй велию любовь к Истинному Богу и Пречистой Его Матери, посетил еси землю Израильскую, поклоняся и лобызая святыя места, идеже пребываше Господь наш Иисус Христос и Пречистая Дево Мария. Мы же, удивляющесе таковому благому подвигу твоему, вопием ти:

Радуйся, Бога — Отца Небесного паче земнаго отца возлюбивый;

Радуйся, Матерь Божию — Пречистую Деву Марию — и твою Матерь быти возжелавый;

Радуйся, во чреве матере твоея чрез частое ея причащение Тела и Крови Господней Богом благословенный;

Радуйся, Пречистою Богородицею Девою — игуменией всех монашест-вующих — паче многих иноков возлюбленный;

Радуйся, яко благодать Божия от ранней юности на тебе почил а есть;

Радуйся, яко та благодать до конца дней твоих на тебе пребывала есть;

Радуйся, омовением в купели Силоамстей, образ порождения тобою множество чад духовных ознаменовася;

Радуйся, возлиянием на тя елея от святых лампады Вифлеемстей сила благодати Божией, от тебя исходя щия, показася;

РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.

#### **КОНДАК 4**

Бурю ярости врагов видимых и невидимых  
отражая великим смирением и ангельским  
терпением, возлюбил еси путь средний, царский:  
послушания, молитвы и труда, и тако восшел  
еси сим средним путем во славе велией в Горний  
Иерусалим, и тамо со всеми святыми и Ангелы  
ликуеши и радуешися неизреченно, воспевая  
Богу: АЛЛИЛУИА.

#### **ИКОС 4**

Слышахом о подвизех твоих на святей горе  
Афоне, идеже тяжкая послушания, яко легкое  
бремя Христово понесл еси, братии  
монастырстей и паломником православным  
послужити сподобился еси, яко раб верный и  
смиренный, поучался иноческому житию у  
Богоугодного пустынножителя Афонского  
Мелхиседека. Мы же, дивящися таковому твоему  
усердию, восхваляем тя, служителю Христов,  
поюще сиче:

Радуйся, истинный воин Христов;

Радуйся, низложивый невидимых врагов;

Радуйся, паче всего возлюбивый иноческое  
житие;

Радуйся, возлюбленный за то Игуменией, святая горы Афона и всех православных обителей;  
Радуйся, всего себя Богу в жертву принесенный;  
Радуйся, яко кадило благовонное, пред Богом душою и телом благоухавый;  
Радуйся, истинный послушанием волю свою отсечь потщился еси;  
Радуйся, яко умную молитву Иисусову стяжати сподобился еси;  
**РАДУЙСЯ, ПРЕПОДОБНЫЙ ОТЧЕ НАШ КУКШЕ, ВЕЛИКИЙ ИСПОВЕДНИЧЕ ХРИСТОВ.**

### **КОНДАК 5**

Боготечней звезде уподобился еси, Отче, егда по воле Божией со Старого Афона во святую Киево-Печерскую Лавру преселился еси, идеже в смутное время обновленчества непоколебимым столпом чистоты православныя веры показался еси; вси же братия Лавры последовавше таковому примеру твоему, яко истинныя воины Христовы, отразиша еретическое нашествие, славяще Бога и поюще Ему: АЛЛИЛУИА.

### **ИКОС 5**

Видевше чистое житие твое и непрестанную молитву Иисусову, с трудами телесными соединяемую, вручиша тебе послушание святая мощи Угодников Божиих, в Пещерах

почивающих, хранить и облачати. Ты же, Отче святой с великим усердием, служа Угодником Божиим, бегая сна и телесного упокоения, Ангелу во плоти уподобился еси. Тем же мы вси, таковому труду твоему дивящися, вопием ти: Радуйся, древним Киево-Печерским Угодником послужити сподобивыйся; Радуйся, яко и сам тем Угодником уподобивыйся; Радуйся, сосуде, благодатными дарами Божиими исполненный; Радуйся, Отче Богодухновенный, прозорливый; Радуйся, яко еще и живой благоухание от тела источал еси; Радуйся, всех приходивших к тебе духовно утешал еси; Радуйся, истаявающих гладом душевным и телесным питателю; Радуйся, безвозмездный заимодателю и пречудный нестяжателю; РАДУЙСЯ, ПРЕПОДОБНЫЙ ОТЧЕ НАШ КУКШЕ, ВЕЛИКИЙ ИСПОВЕДНИЧЕ ХРИСТОВ.

## **КОНДАК 6**

Исповедник славы Божией воистину явился еси, Отче наш Кукше, егда велия брань воздвигнута бысть на Церковь Христову и святых обители. Ты же, претерпевая злыя напасти врагов

видимых и невидимых, яко добрый пастырь, словесныя овцы пасый, не давал еси погибнути душам православным в треволнениях житейского моря, молитвами же своими утишая бури в сердцах маловерных, многих людей тогда ко Христу привел еси, поя с ними Богу:  
АЛЛИЛУИА.

### **ИКОС 6**

Воссиял еси камени драгого светлейши, угодниче Богоносне, егда ты за Господа потерпети в темницу к разбойником и татем ввергли еси. Тии же злии людие кротостию и смирением твоим поражены быша, не смеюще тебе уязвити, но со благоговением взирающе на ты, святой Отче. Мы же вси видяще, яко воистину врага духом кротости и смирения победил еси, воспеваем ти сицевая:  
Радуйся, тихий Ангел Господень, злых разбойников видом твоим укротивый;  
Радуйся, образ кроткаго послушания и в темнице явивый;  
Радуйся, яко тамо за Господа болезни и труды тяжкие, яко Крест свой подъявый;  
Радуйся, велий глад и мраз претерпевая, в лесных дебрех труждатася принуждаемый;  
Радуйся, яко волею Божией в заключении чудесне тебе Святыя Дары ниспосланы быша;

Радуйся, яко многих монашествующих, в темнице томимых, теми Дары причастил еси; Радуйся, яко в день Святыя Пасхи, истаявая от глада телеснаго, у врана летящаго пищи просил еси;

Радуйся, аки древнему бо Илии вран той по молитве тебе снесь принесет;

**РАДУЙСЯ, ПРЕПОДОБНЫЙ ОТЧЕ НАШ КУКШЕ, ВЕЛИКИЙ ИСПОВЕДНИЧЕ ХРИСТОВ.**

### **КОНДАК 7**

Хотя Бог наш Иисус Христос явити народу тя, святыи Отче, егда по пяти летех заточения темничнаго, устрой тебе послану быти в землю Вятскую, идеже ты, яко светило воссиял еси, показуя пример благочестия, веры и велией любви к ближнему. Тем же воистину пастырь добрый явился еси людем, благодарне пощим Богу: АЛЛИЛУИА.

### **ИКОС 7**

Новое показа человеколюбие Господь, егда возвратил тя, Отче, во обитель Печерскую во святыи град Киев, идеже встречаху тя братия со славою мною; мирстии же людие притекаху к Тебе издалече, святыи Отче, и ищуще утешения в скорбех и облегчения в болезнех твоими святыми молитвами ко Господу и Пречистей

Деве Марии. Мы же, умиляясь силе молитв твоих, славим тя сице:

Радуйся, исповедниче великий и предивный;

Радуйся, провидец душ и сердец прозорливый;

Радуйся, сокровенных грехов обличителю;

Радуйся, всех в скорбех к тебе притекающих утешителю;

Радуйся, по воле возлюбившего тя Христа ежедневно Тому приобщавыйся;

Радуйся, Воскресшаго Господа в сердце твоём всегда имети сподобивыйся;

Радуйся, яко сила Божия от тебя исхождаше;

Радуйся, яко велия благодать Божия на тебе пребываше;

**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

### **КОНДАК 8**

Странное видим, егда исконный завистник — враг рода человеческого, не терпя твоих Богоугодных дел, Отче пречудный, воздвигл есть на брань власть имущих, повелевших тебе преселиться во иную обитель. Ты же, яко истинный послушник, пришел еси в Свято-Успенскую Почаевскую Лавру, вдав себя в покров и заступление Почаевския Божия Матере, не имея на земле инья помощи и защиты, Богу же поя: АЛЛИЛУИА.

## **ИКОС 8**

Весь сладость, весь желание тебе бысть  
сладчайший Иисус, егда ты телом предстоял  
пред святым престолом в Храме Господнем,  
душею же на Небеси, лицезрел Владыку Неба и  
земли, подобен был еси Ангелу во плоти. Людие  
же, видевше силу молитв, от тебе исходящих, с  
трепетом и любовью тебе воспеваху:

Радуйся, Господа Бога пречудный служителю;

Радуйся, великий о людех пред Богом ходатаю;

Радуйся, Иисуса Сладчайшаго в сердце твоём  
носивый;

Радуйся, весь и всюду в Господе Боге ходивый;

Радуйся, яко Храм Божий, аки рай небесный  
возлюбил еси;

Радуйся, яко ангельски на земли пожил еси;

Радуйся, молитвенниче наш усердный;

Радуйся, ходатаю пред Богом о нас крепкий;

**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

## **КОНДАК 9**

Все естество ангельское вельми возрадовахуся,  
видя тя, игумена славнаго, во ангельский образ  
облекавшаго жаждущих жития монашескаго, и  
молящегося ко Господу, да укрепит их на пути  
сем узком и тернистом и спасет души их, в миру  
рассеянных и обуреваемых волнами житейскаго

моря. Все же чада твоя духовная благодарственная о тебе со слезами умиления поют Богу: АЛЛИЛУИА.

## **ИКОС 9**

Ветии многовещаннии не возмогут изрещи множество чудодееаний твоих, блаженне Отче: всех бо любовью своею объемля — тако и мати родная не может любити — утешителю пречудный, лютыя скорби молитвами своими прогонял еси, унывающие же души неизреченно радуя, гордыню к кротости низводя, в неверующих возжигал еси огонь пламенный веры в Бога истиннаго и жизнь вечную, сего ради глаголем сицевая:

Радуйся, по Бозе Спасителю душ наших;

Радуйся, исцелителю болящих;

Радуйся, любовью твоею закоренелую злобу прогоняли;

Радуйся, кротостию гордыню низлагая;

Радуйся, всех приходящих к тебе дивный утешителю;

Радуйся, заблудших душ в Божий мрежи ловителю;

Радуйся, и в сонных видениях нас посещали;

Радуйся, теми же нас вразумляли;

**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

## **КОНДАК 10**

Спасти хотя Бог наш Иисус Христос души, в беззакониях погибающий, промыслом Своим пресели ты во обитель Святаго Иоанна Богослова, близ Молдавии бывшую, идеже три лета старчества твоего многия тысящи людей к тебе притекавших, направлял еси, по пути к Царствию Божию. Видя же шествующих право, в неизреченной радости воспевал еси:  
АЛЛИЛУИА.

## **ИКОС 10**

Стена был еси, и ограждение всем монашествующим, в миру спасающимся, мудрый наставник во святых обителях жительствующим, всем же иночествующим — Игумен преславный. Тем же и мы, спасаемии тобою, вопием:  
Радуйся, паче иных всех — монашествующих возлюбивый;  
Радуйся, велие попечение о душах их явивый;  
Радуйся, истинный пастырь словесного стада Христова;  
Радуйся, за всех иночествующих молящий  
Всевышняго Бога;  
Радуйся, яко тысяща чад духовных у тебя обретеса;  
Радуйся, яко вси сии в миру рассеяни быша, но

по молитвам твоим от мира сего отвергошася;  
Радуйся, строгий наставниче целомудрия;  
Радуйся, твердый ревнителю благочестия;  
**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

### **КОНДАК 11**

Пение благодарственное Пресвятей Троице  
воспеваху братия Свято-Успенския Одесский  
обители Патриаршия, егда встречаху приход  
твой, Отче достохвальный, великаго чтуще в  
тебе Угодника Божия, воссиявшаго аки светило  
Богосветлое во мраце неверия и заблуждения. И  
мы, видяще таковое о тебе благодарение, поем  
Богу: АЛЛИЛУИА.

### **ИКОС 11**

Светоприемный светильник был еси,  
преподобне, егда в древних летех предстоял  
язвами прободенными ногами во святая святых  
по вся дни, приносяща Богу жертву безкровную  
за души всех живущих и почивших, попаляя  
грехи их твоими огнеподобными молитвами. Мы  
же вси дивящеся таковому о тебе произволению  
Царицы Небесный, воспеваем сиче:  
Радуйся, жилище Духа Святаго;  
Радуйся, молитвенниче, благодатию Божией  
исполненный;

Радуйся, града Одессы сокровище многоценное;  
Радуйся, христианам во истинней вере  
утверждение;  
Радуйся, отступники к Богу возвращали;  
Радуйся, врагом прощати научай;  
Радуйся, пример детского незлобия нам  
показавый;  
Радуйся, образе Иовля терпения собою явивый;  
**РАДУЙСЯ, ПРЕПОДОБНЫЙ ОТЧЕ НАШ КУКШЕ,  
ВЕЛИКИЙ ИСПОВЕДНИЧЕ ХРИСТОВ.**

### **КОНДАК 12**

Благодатию Божией осияваяй всех приходящих  
к тебе и чающих получили твое благословение,  
Отче великий, до девяностидесяти лет пожити  
сподобился еси, при конце земнаго пути своего  
Господа Бога во славе на Престоле сидящаго  
зрети удостоен был еси, и с того часа до  
кончины своея, телом находяся на земли,  
духовныма очима созерцал небесныя обители:  
Горний Иерусалим и Новый Афон. И тако мирно  
ко Господу вскоре отшел еси. Мы же, видя твое  
святое житие и блаженную кончину, воспеваем  
прославляемому тобою Богу: АЛЛИЛУИА.

### **ИКОС 12**

Поем твое пречудное на земли житие, ублажаем  
святое успение твое, Отче наш преподобный. Ты

же молися ко Господу, яко и обещался еси не оставити требующих твоея помощи и заступления. Надеющихся на твое о нас перед Богом ходатайство, воспеваем сия:  
Радуйся, Отче новый и великий;  
Радуйся, насельник Горния обители;  
Радуйся, дерзновение перед Господом стяжавый;  
Радуйся, славу Божию видети сподобивыйся;  
Радуйся, яко со Ангелы на Небеси Бога прославляеши;  
Радуйся, яко Царицу Небеси и земли купно с ними тамо величаеши;  
Радуйся, земных ради трудов венцем славы увенчанный;  
Радуйся, чистоты ради душевной и телесной в белоснежную ризу облаченный;  
**РАДУЙСЯ, ПРЕПОДОБНЫЙ ОТЧЕ НАШ КУКШЕ, ВЕЛИКИЙ ИСПОВЕДНИЧЕ ХРИСТОВ.**

### **КОНДАК 13**

О, преславный и пречудный Отче наш Кукше! Приими сие малое моление, от всего сердца тебе нами приносимое, и умоли Господа Бога дати нам оставление грехов, исцеления в болезнях, утешения в скорбех, терпения во искушениях. Да тако твоими молитвами сподобимся «в мире сем пожити, Богу угодити и наследовати

Царство Небесное», со всеми святыми поюще Царю славы: АЛЛИЛУИА.

(сей кондак глаголи трижды, затем читай 1-й икос и 1-й кондак)

## **МОЛИТВА**

О, предивный угодниче Христов, преподобне и богоносне Отче наш Кукше! Ты яко солнце богосветлое воссиял еси в земли Российстей в годы безбожнаго правления и гонения на православие и Святую Церковь Христову, и яко столп великий восстал еси от земли до неба и от востока до запада, славу Божию показуя и всем, к тебе притекающим, грехи отпуская и утешая, изливая благодать и неизреченную любовь к людям. Тем же и Господь Бог прослави тя в дни земнаго жития твоего даром исцеления, чудотворения, прозрения грядущаго, яко настоящего. Ты же, Отче святой, предстоя у Престола Царя Славы, молися о нас грешных и немощных, да поможет Господь Бог нам чистоту православия твердо хранить, нападения еретическая мужественно отражати, в вере христианской благочестно пребывати, да укрепит наша душевныя и телесныя силы для покаяния истиннаго, исправления совершеннаго и неленостнаго творения добрых дел, я сподобит нас стяжать благодать Духа Святого, Его же мы

всем сердцем и всею душою славим и величаем  
со Отцем и Единородным Его Сыном всегда,  
ныне и присно, и во веки веков. АМИНЬ.



**ПОЛНЬІЙ  
АКАФИСТНИК  
КАНОНИЧЕСКІЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**